

- विधानसभा मांय कुछ नुवा जिला निरस्त करण रा मुद्दा माथे चर्चा व्ही— संसदीय कार्यमंत्री जोगाराम पटेल कह्यो—राज्य सरकार ने जिला बणावण अर निरस्त करण रो पूरो हक ।
- प्रधानमंत्री नरेन्द्र मोदी कह्यो—केन्द्र सरकार राष्ट्र प्रथम री भावना सागे काम कर रही है ।
- जयपुर जिला मांय दूदू कने व्हा सड़क हादसा मांय आठ जणां री मौत—तीन जणा जख्मी व्हा ।
- राष्ट्रीय खेलां मांय दस मीटर एयर पिस्टल मिक्स्ट टीम होड़ मांय राजस्थान आज चांदी रो तमगो जीत्यो ।

000

विधानसभा मांय आज कुछ नुवा जिला निरस्त करण रा मुद्दा माथे चर्चा व्ही । संसदीय कार्यमंत्री जोगाराम पटेल शून्यकाल रे दौरान व्ही चर्चा रे दौरान कह्यो के जिला बणावण या खत्म करण रो राज्य सरकार ने पूरो हक है । वे कह्यो के सरकार पूरी साफगोई, निष्पक्षता अर दूरगामी सोच सागे कुछ नुवा जिला खत्म करण रो फैसलो कीनो है ।

गृह राज्यमंत्री जवाहर सिंह बेढम नुवा जिलां रा मुद्दा माथे व्ही चर्चा रो ब्यौरो देता थकां कह्यो के विपक्ष कने कोई सोच अर मुद्दो नी है । वे कह्यो के मौजूदा सरकार जनता री मांग परां ही नुवा जिलां रा ओजू परिसीमन रो फैसलो कीनो है ।

सदन मांय चिकित्सा अर स्वास्थ्य मंत्री गजेन्द्र सिंह खींवसर बतायो के प्रदेश मांय राजमैस सोसायटी रा तैत 22 मेडिकल कॉलेज खोली ज्या है । वे कह्यो के प्रतापगढ़, राजसमंद अर जालौर मांय मेडिकल कॉलेज पीपीपी मोड माथे चलाया जावेला । एक और सवाल रा जवाब मांय खींवसर भरोसो दिरायो के साइबर थानां कानी ऊं रपट दर्ज करण मांय आना—कानी करण वाळां रे खिलाफ कार्रवाई करी जावेला ।

000

मुख्यमंत्री भजनलाल शर्मा आज विधानसभा मांय **भाजपा** विधायक दल री मीटिंग लीनी । ई दौरान श्री शर्मा सगळा विधायकां ऊं सदन मांय बत्ता ऊं बत्ता बगत ताई मौजूद रेहवण बाबत् कह्यो । मुख्यमंत्री विधायकां ऊं पूरी तैयारी सागे सदन मांय आवण सारू ई कह्यो ।

000

प्रधानमंत्री नरेन्द्र मोदी कह्यो है के केन्द्र सरकार राष्ट्र प्रथम री भावना सागे काम कर रही है । वे बजट सत्र रे दौरान राष्ट्रपति रा अभिभाषण ने प्रेरणा देवण वाळो बताता थकां कह्यो के श्रीमती मुर्मू सरकार रा कामकाज री सराहणा कीनी । प्रधानमंत्री संसद रा दोन्यू सदनां री भेळी मीटिंग मांय राष्ट्रपति रा अभिभाषण रा धन्यवाद प्रस्ताव माथे आज राज्यसभा मांय चर्चा रो जवाब दे रह्या हा ।

000

परीक्षा पे चर्चा कार्यक्रम रो आठवों संस्करण दस फरवरी ने व्हेला । नई दिल्ली रा भारत मण्डपम मांय व्हेवण वाळा ई कार्यक्रम मांय प्रधानमंत्री विद्यार्थियां सागे बातचीत करेला । इण ने आठ कड़ियां वाळा नुवा रुप मांय कर्यो जावेला । ई कार्यक्रम रो सीधो प्रसारण दूरदर्शन, स्वयं, स्वयं प्रभा अर प्रधानमंत्री रा दफ्तर रा यू-ट्यूब चैनल अर शिक्षा अर सूचना अर प्रसारण मंत्रालय रा सोशल मीडिया चैनल माथे कर्यो जावेला । शिक्षा मंत्रालय रे मुजब ई पाछे कार्यक्रम रा दूजा अंकां मांय न्यारा—न्यारा हलकां री हस्तियां विद्यार्थियां सागे बातचीत कर र अनुभव बतावेला । मंत्रालय रे मुजब ई कार्यक्रम मांय हर राज्य अर केंद्र रा राज वाळा प्रदेशां री स्कूलां ऊं विद्यार्थी चुण्णी ज्या है ।

000

जयपुर जिला मांय दूदू कने व्हा एक सड़क हादसा मांय आठ जणां री मौत व्हे गयी अर छह जणा जख्मी व्हे ग्या । ओ हादसो नेशनल हाई—वे नम्बर 48 माथे मोखमपुरा हलका मांय रोड़वेज री बस अर कार बीचे व्ही टक्कर रे कारण व्ह्यो । पुलिस ऊं मिली जाणकारी रे मुजब कार रो टायर फाट जावण

रे कारण आ कारबेकाबू व्हे र दूजी ओर ऊं आ रही बस ऊं टकरा गयी। पुलिस अर प्रशासन मौके पूग र बचाव रो काम सरु कर दीनो।

000

प्रदेश मांय नशीली चीजां रे खिलाफ चलायी ज्या अभियान रा तैत 12 सौ ऊं बत्ता मामला दर्ज करी ज्या है। आं मामलां मांय 122 ईनामी तस्करां समेत करीब 14 सौ आरोपितां ने पकड़ी ज्या है। पुलिस महानिदेशक यू.आर. साहू आज खबरनवीसां सागे बातचीत करता थकां आ जाणकारी दीनी। वे बतायो के ई दौरान करीब साढे 54 करोड़ रुपया मोल री नशीली चीजां अर प्रतिबंधित दवाइयां ई जूब्त करी ज्यी। श्री साहू कह्यो के लारला महीना चलायी ज्या ई खास अभियान रा तैत नशीली चीजां गैर कानूनी तरीका ऊं लावण-ले-जावण, भेळी करण अर बेचण वाळां रे खिलाफ करड़ी कार्रवाई करी ज्यी। श्री साहू बतायो के पुलिस प्रदेश मांय साइबर अपराधां माथे लगाम लगावण सारु **ऑपरेशन साइबर शील्ड अभियान** चलायो। वे बतायो के ई रा तैत श्रीगंगानगर मांय दो हजार करोड़ रुपया ऊं बत्ती रकम री ठगी करण वाळा आठ आरोपितां ने गिरफ्तार करी ज्या। जयपुर मांय फ़र्जी कॉल सेंटर चलावण वाळा गिरोह ऊं जुड़या तीस आरोपितां ने पकड़ी ज्या।

000

उत्तराखंड मांय चाल रहया 38वां राष्ट्रीय खेलां री दस मीटर एयर पिस्टल मिक्स्ड टीम होड़ मांय राजस्थान आज रजत पदक हासिल कीनो। 28 जनवरी ऊं चाल रहया राष्ट्रीय खेलां मांय राजस्थान हाल ताई सोना रा सात, चांदी रा पांच अर कांसा रा पंद्रह समेत कुल 27 तमगा जीत्या है। मेडल लिस्ट मांय राजस्थान 11वीं ठौड़ माथे है। कर्नाटक हाल ताई 54 तमगा जीत र अव्वल है।

000

राज्यपाल हरिभाऊ बागडे आज नई दिल्ली मांय चाल रहयो विश्व पुस्तक मेळो देख्यो। वे ई मेळा ने पुस्तक पाठक सरोकारां री निजर ऊं खास बतायो। राज्यपाल मेळा मांय राष्ट्रीय पुस्तक न्यास री ओर ऊं करी जा रही न्यारी-न्यारी गतिविधियां री सराहवणा कीनी।

000

भीलवाड़ा मांय काल भीलवाड़ा महोत्सव सरु व्हेला। म्हाणा खबरनवीस बतायो के अटूट धागे संस्कृति रा मुद्दा माथे व्हेवण वाळा तीन दिन रा ई महोत्सव मांय राजस्थान री समृद्ध लोक संस्कृति, पारम्परिक पहराव अर नाच-गाण रा न्यारा-न्यारा कार्यक्रम राख्या जावेला।

000

जयपुर मांय काल **भारतीय पक्षी मेळो** सरु व्हेला। **वन्यजीव और मानव के बीच संघर्ष** मुद्दा माथे दो दिन रो ओ मेळो जलमहल परां मानसागर झील कने लगायो जावेला। इण मांय परिन्दां रा जाणकार दूरबीन रे जरिये भांत-भांत री प्रजातियां रा परिन्दा बता र वां ने बचावण रा बारा मांय जाणकारी देवेला। ओ मेळो जयपुर चिड़िया घर अर वाइल्ड लाइफ सोसायटी ऑफ इंडिया री ओर ऊं लगायो जा रहयो है।

000

प्रदेश मांय आज नागौर, करौली, सीकर अर बीकानेर जिलां मांय कठे-कठे शीतलहर रा हालात रहया। मौसम केन्द्र जयपुर रे मुजब सीकर जिला रा फतेहपुर मांय 2 दशमलव 8 डिग्री सेल्सियस न्यूनतम तापमान दर्ज करी ज्यो। 14 ठोड़ां आज न्यूनतम तापमान 7 डिग्री सेल्सियस ऊं नीचे रह्यो, जदके लारला 24 घंटां मांय दिन री बगत तापमान औसतन 25 डिग्री सेल्सियस ऊं नीचे रह्यो। शेखावाटी हलका मांय कठे-कठे काल ई शीतलहर रा हालात रेहवण रा आसार है। जयपुर अर सवाईमाधोपुर मांय आज आखा दिन सीळो बायरो बाजतो रह्यो।

000

प्रदेश री सरकारी अर गैर सरकारी स्कूलां मांय तीन फरवरी ने करी ज्यो भेळो सूर्य नमस्कार कीर्तिमान बणायो। सूरज सातम रा उपलक्ष मांय राख्यी ज्या ई आयोजन मांय एक करोड़ 53 लाख ऊं बत्ता लोग शिरकत कीनी। ई सागे ई लारला साल रा एक करोड़ 33 लाख प्रतिभागियां रा रिकॉर्ड ने पिछाड़ दियो ज्यो। वर्ल्ड बुक ऑफ रिकॉर्ड्स रा नुमाइन्दा शिक्षा मंत्री मदन दिलावर ने आज विधानसभा परिसर मांय ई रिकॉर्ड रो सर्टिफिकेट दीनो।

000

माली साल 2025-26 मांय रिटायर व्हेवण वाळा राज्य कर्मचारियां री राज्य बीमा पॉलिसी 1 अप्रैल ने भुगतान सारु पाक जावेला। राज्य बीमा अर प्रावधायी निधि विभाग री ओर ऊं आं पॉलिसियां रा चुकारा री रकम ई साल अप्रैल महीना रा पहला सप्ताह मांय कर्मचारियां रा बैंक खाता मांय जमा करा दी जावेला। राज्य बीमा अर प्रावधायी निधि विभाग रा निदेशक धनलाल शेरावत बतायो के संबंधित बीमादारां रा दावां रो टेमसर चुकारो करण रा मकसद ऊं वां ने दावा फॉर्म ऑनलाइन तरीका ऊं जमा करावण बाबत् कह्यो जा रह्यो है।